

近代中國史料叢刊第十八輯
沈雲龍主編

楊勇愨公（厚菴）遺集

楊岳斌著

文海出版社印行

楊勇愨公

遺集首卷

光緒二十一年冬
十一月問竹軒刊

W. H. ...

楊勇愨公遺集卷首目錄

上諭

諭賜祭文

御製碑文

國史本傳

湖南巡撫代遞遺摺疏

閩浙總督查明事蹟疏

並摺略

神道碑

奏議長江圖說

雜著詩稿副刻

--	--	--	--	--	--	--	--	--	--

光緒十六年八月二十八日內閣奉

上諭前任陝甘總督楊岳斌忠勇性成勳勞卓著咸豐初年隨同前大學士曾國藩勦髮逆創立師船由湖北安徽江西直達江甯肅清江面數千里厥功甚偉同治三年克復江甯省城蒙

穆宗毅皇帝眷念勛勤賞給一等輕車都尉並賞加太子少保銜復由福建提督簡授陝甘總督嗣因親老准其回籍終養朕御極後命巡閱長江水師上年服闋後奏准在籍養病方冀調理就痊長資倚

昇茲聞溘逝軫惜殊深楊岳斌著追贈太子太保
銜照總督例賜卹任內一切處分悉予開復應得
卹典該衙門察例具奏加恩予諡並於立功省分
建立專祠其生平戰功事蹟宣付史館立傳伊子
附生楊潛儀著賞給舉人准其一體會試伊孫候
選縣丞楊鎮榮著以知縣用楊道讓俟及歲時由
吏部帶領引見用示篤念蓋臣至意欽此

諭賜祭文

朕維經文緯武鼎鐘銘不朽之勳崇德報功俎豆
重惟馨之祀緬成勞於在昔悼切騎箕頌曠典以
飾終恩隆奠學爾原任陝甘總督楊岳斌素懷忠
勇深曉韜鈴慷慨請纓夙奮乘風之志馳驅捧檄
常深誓日之情踐矢石以奏功簡心久在建旌旄
而作鎮方面頻膺勇著虎頭旂常錫號輝生雀羽
冠冕增榮提魚麗之兵專闡曾兼乎水陸靖鴟張
之寇建瓴直駛乎帆檣仗忠信以涉波濤心忘履

險執干戈而衛社稷志切同仇扶大局於東南帶
礪重河山之誓制全軍於西北旌旗揚關隴之威
兵揮九地九天常操勝算名繼一韓一范卓著英
聲祇因從事奔馳莫遂承歡之願用是加恩體恤
俾伸終養之私許李密之陳情孝思克慰起廉頗
而爲將偉烈彌彰方期歲月舒長湛露永承楓陛
豈意風雲黯淡大星遽隕枌鄉軫念勤勞良深悼
惜旣悉蠲乎往咎仍延賞於後昆於戲靈爽常存
聽鼓鼙而增感哀榮具備奠秬鬯以流芳惟爾精

誠歆茲芬苾

--	--	--	--	--	--	--	--	--	--

御製碑文

朕惟芳流彤史特彰百戰之功實紀青珉用播千秋之美酬勲勞之卓著生前已歷崇階示恩禮之優隆身後宜加異數爰申巽命永勒豐碑爾前任陝甘總督楊岳斌壯志軒昂英姿颯爽仗從戎之策能發能收揮克敵之戈同仇同澤立勲閩外屢晉頭銜錫命行閒頻邀心簡殊榮渥沛飄翠羽以揚輝顯號優加本丹心而有勇坐鎮貔貅之隊節建鄖襄迭提鵝鶴之軍威行漢沔中流擊楫志矢

澄清大纛臨江師勤訓練等狄青之起卒伍早揚
銅面之威比王濬之下樓船竟建石頭之績三湘
七澤烽燧無驚楚水吳山櫓槍盡埽旣告功於北
闕襲世職以增榮復受任於西陲制雄軍而奮武
嗣以馳驅敵愾屢奏鷹揚定省縈懷乞伸烏哺白
華笙譜已安將母之心綠野堂開仍擁閱兵之節
方謂桑榆日永倚畀長資何期帷幄風饗淪殂遽
告朕軫懷宿將篤念耆年用延賞世之恩兼賁易
名之典謚之勇愨嘉爾勳猷於戲虎奮如生浩氣

壯風雲之色螭盤永耀温綸爭日月之光特錫寵
揚俾昭來許

國史本傳

楊岳斌原名載福湖南善化人原籍乾州廳祖
勝儒從勦乾州苗匪在永綏王瓜寨殉節父秀
貴直隸宣化鎮遊擊載福幼嫻騎射道光二十
六年由行伍補長沙協左營外委二十九年新
甯匪首李沅發就擒載福在事出力

賞戴藍翎咸豐二年粵匪竄湖南載福守湘陰有功升
宜章營千總三年在籍侍郎曾國藩督辦團練
治水師於衡州調載福領右營四年四月偕生

員彭玉麟攻湘潭踞賊載福骹臂俱傷裹創屢
戰八日十捷克之擢守備

賞換花翎六月進規岳州載福率水師伏雷公湖彭玉
麟伏君山別隊趨南津港誘賊船出佯卻賊追
之伏起盡焚其船官軍入岳州七月賊再至載
福駕艇沿湖東岸斜行捷如飛鳥及近揮旗發
礮斃賊多名僞丞相汪得勝護衛甚眾載福飛
槳挺矛刺殺之奪其船追奔至臨湘逆船無一
還者捷入以都司補用

賞彪勇巴圖魯名號越一日擊賊於擂鼓臺日暮北風大作賊艘五六百挂帆直上水師戰船僅七十餘載福親操舳舻率所部駛入賊隊繞扼其背斷賊後至者乘風縱火賊陣遂亂大破之擢遊擊尋破賊於城陵磯閏七月追剿至湖北倒口搽殺港汊踞匪淨盡於是岳州門戶始固而賊由荆入蜀之路塞矣八月偕都司蕭捷三夜襲嘉魚之黃蓋湖賊駭竄載福先入中火傷舟覆落水躍上別船大呼陷陣焚賊船四十餘盡洗

沿江各村市之賊乘勝下金口沌口燒鹽關賊船二百餘破漢陽關等賊營直趨塘角兩岸賊壘俱燼嗣見賊船下竄載福急槳出賊前逆擊之盡焚其輜重駛入漢口毀船隻無數遂會陸軍攻武昌漢陽克之曾國藩等疏稱載福廉明愛士膽力堅定從下游逆擊而上甚合機宜

詔升參將加副將銜載福又以二十餘船迎剿襄河賊焚其船千餘官軍自此一意東下無後顧憂矣是月

詔授湖南常德協副將仍督勇勦賊曾國藩奏定三路
進兵中路令載福等率師船先發九月克黃州
府武昌縣順流而東截擊下游援賊載福等以
爲賊至而迎敵不若及其未至擊之遂駛至蘄
州賊開礮拒戰勢衰而潰載福等分半追毀其
船於骨牌磯以其半環攻未開之賊船殲焉十
月陸軍破半壁山水軍進徧田家鎮時賊守備
甚嚴上游逃賊盡萃於此載福彭玉麟密與陸
軍籌定破賊之策分舟師爲四隊一專斷其橫

江鐵鎖一專轟賊船一候鎖毀下駛大燒賊船
一守老營防賊上犯而陸軍列陣南岸壯水師
聲威又議先燒上游逆船則下者遠竄不如窮
追數十里從下游延燒而上及戰賊殊死鬪我
軍擊其護鐵鎖者二艘須臾鎖斷奮呼乘之賊
大潰追至武穴出其前乃縱火大燒東南風甚
賊船不能下駛無一遺者載福以武穴之下尙
有賊船鼓棹窮追至龍坪是役凡毀賊船四千
餘皆歷年所攜民船也遂拔田家鎮而蘄州賊

亦遁去載福徹夜窮追勞苦嘔血

詔嘉其勤勩最著加恩賞總兵銜於是水師進攻江西
九江載福以疾畱武穴既而疾甚假歸五年九
江水師失利賊上犯再陷武昌漢陽三月湖南
巡撫駱秉章奏言載福忠勇善戰廉明樸訥眾
心素附宜令招集部曲修船添械督師東下重
清江面與曾國藩湖口一軍會合得

旨令統率師船速赴武昌軍營七月偕各軍攻拔漢口
鎮平漢陽城外賊壘與知府彭玉麟毀襄河口

鐵索浮橋血戰十日斬獲無算九月退屯新隄
修船汰各營水師十之三簡鍊精銳以圖大舉
十月湖北布政使胡林翼疏稱載福每戰必先
病不言勞功不言賞志識高出尋常爲水師將
才最時載福已擢湖北鄖陽鎮總兵疏入

命兼署湖北提督十一月軍至金口遣都司鮑超等環
擊賊船悉沈之岸賊亦棄壘遁進屯沌口十二
月敗賊鮎魚套及南岸背六年四月會陸師攻
漢陽飭李成謀等下駐沙口斷賊水運自督所

部攻兩岸賊壘時漢陽東南沿江一帶賊船二百餘排礮堅守阻遏我軍載福密備火船乘南風一炬空之又敗黃州等處來援之賊五月率李成謀等躡進至黃州歷蘭溪武穴龍坪直抵九江盡掃各岸賊船還泊沙口七月九江逆首石達開糾黨來援江甯將軍都興阿擊之黃州載福以水師策應尋破油坊嶺上青山賊巢九月敗援賊於蘄州十一月水陸會攻武昌漢陽水師上下夾擊載福督陣指揮燒賊船淨盡兩

城同日克復賊眾萬餘斬溺無遺捷入

賞加提督銜載福乘勝偕記名按察使李續賓陸軍拔
樊口破武昌縣克黃州卽日下駛克蘄州軍至
九江先剿北岸小池口賊船盡爲我有遂會陸
軍攻府城七年正月曾國藩自吳城迎勞諸軍
疏言載福與李續賓都與阿等積勞之後屢勝
之餘猶復日夕兢兢夜不解帶軍威嚴肅士氣
樸誠實爲不可多得之勁旅二月曾國藩丁憂
離營疏請將外江內湖水師

特派載福總統以彭玉麟副之

上嘉勉載福

命統帶曾國藩一軍與彭玉麟協力督剿四月賊復犯
蘄州羅田號稱十萬都興阿等分軍上援載福
亦分水師扼蘄州要路五月親臨布置之六月
派都司胡友亮先繞廣濟搽剿內湖平童司牌
逆壘七月蘄州水師屢獲大勝八月蘄黃肅清
載福會陸軍攻拔小池口僞城九月克湖口得
旨遇有提督缺出由軍機處題奏尋偕陸軍攻拔小孤

山克彭澤及安徽望江東流直抵安慶克銅陵
至蕪湖魯港與江南師船會

詔嘉載福轉戰千里用兵謀略實有過人之處尋授福
建陸路提督

飭專摺奏事九江賊首林啟榮占踞六年守備甚固官
軍屢攻不克八年三月李續賓謀開地道轟之
賊殊死堵拒士卒多傷四月城東南地道復成
約載福水師攻北門臨江一帶藥發城圯百餘
丈奮呼齊登戰竟日擒林啟榮磔之復其城擒

斬二萬六七千名其逸出者水師盡殺之捷

聞

賞穿黃馬褂下部優敘並

諭載福等統領得勝之師迅速東下時江西賊竄偏楚境載福奏言九江克復臣應卽會合都興阿馬步隊伍急趨安慶刻下陸師以援剿麻城肅清北岸爲先駐皖官軍防剿太湖石牌各路尤爲緊要必俟楚境肅清始能會合東下查安慶上一百二十里之華陽鎮爲江防要地卽率領礮

船進駐其閒以爲水師老營不時出擊使安慶之賊不遑他顧俟北岸肅清再與馬步隊拔營前進報

閏五月再克東流進屯黃石磯連攻安慶焚奪鹽河船壘六月督師船越安慶至李陽河率副將王明山攻樅陽盡焚港內賊船飭丁泗濱等攻大通奪其石壘載福自銅陵徑魯港直抵蕪湖審察形勢仍回黃石磯分兵復建德七月調福建水師提督九月都興阿陸軍來會破集賢關載福

豫派師船繞入內湖三面環擊牽制城賊陸軍
遂毀北門外多壘池州賊萬餘掠民船來救安
慶載福派陳金鼇王明山大戰樅陽以遏之十
月李續賓三河軍陷賊謀犯楚境官軍暫解安
慶之圍賊復四出載福屢擊退之十一月分撥
礮船上扼湖北之龍坪武穴田家鎮九年督勦
南北兩岸援皖各賊大小數十戰並隨時派隊
薄城以牽賊勢設資遣難民局於東流先後遣
十三萬六千餘人十二月韋志俊以池州降令

國史本傳 卷一百一十三 三
攻蕪湖其部下復叛還陷池州載福知志俊無
他腸卽其眾分別遣畱得精銳二千五百人令
統率助剿時逆首陳玉成李侍賢率眾萬餘竄
楚及皖水軍移屯觀音洲策應皖北十年四月
會江南師船攻蕪湖對岸蠓磯大捷五月督都
司韋志俊等拔殷家匯進攻池州毀城外石壘
卽日盡撤水陸各營襲樅陽出賊不意拔其僞
城先是總兵吳全美等率江南紅單師船駐蕪
湖以上之魯港載福以江甯尙須礮船議請

飭江甯將軍和春調吳全美等赴下游而自任蕪湖以
上江面六月曾國藩以載福謀勇器識度越諸
將疏請將蕪湖以上江面戰守機宜由載福會
同彭玉麟妥辦八月遣游擊陳代友等攻池州
奪青溪關九月僞忠王李秀成循岸上竄載福
拔隊敗之三山夾穴子橋白茅菁運漕等處分
隊入內湖圍攻神廟山鎮山斷松林口浮橋十
月親督師船由魯港潛行百里解南陵之圍拔
出總兵陳大富一軍救護難民十餘萬置之東

流一帶十一年正月曾國藩疏陳戰績

詔嘉載福出奇制勝調度有方

賞大小荷包搬指翎管小刀等件時道員曾國荃副都
統多隆阿臬司李續宜等軍會攻安慶逆首陳
玉成率眾萬餘來援屢攻樅陽載福飭李成謀
等百計守禦賊不得逞四月督剿赤岡嶺援賊
屢爲賊礮所遏傷亡頗多卒與陸軍合力破之
擒僞先鋒劉瑄琳蓋破我江甯大營連陷蘇常
劇賊也五月督剿無爲州之神塘河平其壘並